



Impoten infomesen abaot Proteksen visa

Infomesen ia hemi stap long ol narafala lanwis. Go long: [Australia's protection obligations \(homeaffairs.gov.au\)](https://www.homeaffairs.gov.au/australias-protection-obligations)

Proteksen visa

Proteksen visa hemi blong ol pipol (o famli blong olgeta) we bae oli stap long denja sapos oli gobak long hom o oli stap fraet long ol narafala we oli tritim nogud olgeta long saed blong:

- res
- rilijen
- nasonaliti
- oli memba blong wan kaen grup o
- tingting blong politik.

Taem yu aplae long wan Proteksen visa, yu stap askem proteksen ("asylum") blong Ostrelia blong protektem yu agensem hom kantri blong yu.

Proteksen visa hemi no blong olgeta we oli wantem stap longtaem nomo long Ostrelia blong wok.

Sapos yu aplae long wan Proteksen visa, yu stap talem aot se wan long ol poen ia, o tugeta, i tru:

- Yu no save gobak long hom – sapos yu gobak long hom bae yu stap long denja o ol narafala i save tritim nogud yu.
- Yu wan famli blong wan man o woman we hemi talem olsem (fes poen antap).

Bae oli no save givim wan Proteksen visa long yu sapos yu gat raet anda long loa blong go long wan narafala kantri mo liv long sefti long wei (we hemi no kantri blong yu), mo bae yu no stap long denja mo bae oli no save tritim nogud yu, mo tu kantri ia bae i no save sendem yu i go long wan narafala kantri we bae yu stap long denja o narafala bae i tritim nogud yu. Bae yu aplae long wan Protection visa nomo sapos yu **rili nidim proteksen (asylum)** long Ostrelia.

Maet i gat ol narafala visa we i moa stret long situesen blong yu. Lanem moa abaot ol narafala visa long: [Explore visa options \(homeaffairs.gov.au\)](https://www.homeaffairs.gov.au/explore-visa-options).

Wanem bae i hapen sapos oli no givim wan Proteksen visa long mi?

Sapos oli no givim wan Proteksen visa long yu, yu no save aplae long fulap ol narafala visa mo bae yu mas livim Ostrelia sapos yu nogat wan stret visa. Sapos yu nogat wan stret visa, oli save holem yu mo muvumaot yu long Ostrelia.

Sapos oli holem yu mo muvumaot yu long Ostrelia, bae oli save askem yu blong pembak praes blong hemia we i save kasem fulap mane.

Sapos wan aplikesen blong Proteksen visa i no go tru bae hemi stap long rikod blong imigresen blong yu fogud. Hemi save mekem i had blong yu wetem famli i kambak long Ostrelia long fiuja. Mo tu, bae i save mekem i had blong kasem wan visa blong ol narafala kantri aotsaed long Ostrelia, be i dipen long wanem kaen visa yu stap aplae from.

Risponsibiliti blong yu taem yu askem proteksen

Hemi risponsibiliti blong yu blong givim ol infomesen we oli askem taem yu aplae long proteksen mo ol dokumen blong sapotem aplikesen bifo Department of Home Affairs oli mekem desisen long hem.

Yu mas mekem i klia from wanem yu nidim proteksen long Ostrelia mo givim stret infomesen long Department hariap.

Taem yu putum wan aplikesen blong wan Proteksen visa, hemi risponsibiliti blong yu blong mekem sua se evri infomesen we yu givim hemi tru mo stretwan, iven sapos wan narafala man o woman hemi komplitim mo submitim long bihaf blong yu.

Yu no sud letem eni narafala man o woman i aplae long wan Proteksen visa blong yu sapos yu no andastanem wanem yu stap aplae from mo wanem infomesen oli putum insaed long aplikesen ia.

Hemi risponsibiliti blong yu blong mekem sua se yu aplae long stret visa mo folem ol rul blong visa, iven sapos yu go tru long wan migresen ejen blong Ostrelia we hemi rejista o wan ligol praktisona blong Ostrelia.

Ol migresen ejen we oli rejista oli listim long websaet blong Department of Home Affairs. Folem [steps to choose a migration agent \(mara.gov.au\)](#).

Panis blong ol kiaman toktok

Taem yu aplae long wan Proteksen visa yu mas mekem wan deklereesen (putum toktok blong talem se aplikesen hemi tru).

Hemi wan series rong long Ostrelia sapos yu givim fols o kiaman infomesen mo bae yu save fesem ol strong panis.

Sapos wan man o woman i givim fols o kiaman infomesen long wan aplikesen blong visa, hemi save kasem ol bigfala faen o taem long kalabus kasem 10 yia, o tugeta.

Sapos oli faenemaot se yu givim fols o kiaman infomesen afta oli givim visa long yu, bae oli save kanselem Proteksen visa blong yu.

I gat fri ligol advaes i stap

Bifo yu aplae long wan Proteksen visa, oli stap enkarajem yu blong faenem [free legal advice](#) long ol ligol provaeda speselis we oli wok long saed blong refiuji mo imigresen loa long stet o teritri blong yu.

Olgeta i save helpem yu blong:

- faenemaot sapos yu mitim ol rul blong wan Proteksen visa o sapos i gat wan narafala visa we yu sud aplae long hem

- andastanem proses blong mekem aplikesen
- andastanem wanem i save hapen sapos aplikesen blong yu long wan Proteksen visa hemi no pas
- mekem wan aplikesen blong wan Proteksen visa sapos i nid.

Mo tu yu save kasem fri ligol help long Legal Aid o wan ligol senta blong komuniti long stet o teritri we yu stap long hem.